

**Nzryr-krbz Pol Krali Mz  
Timoti  
Natq Ngr Nzaplxtqngr Mz  
Nzryr-krbz Pol Krali Mz  
Timoti**

Mc natq ngr nzaplxtqngr mz nzryr-krbz Pol ayrrngr mz Timoti.

Pol yrle letz krali lc mz mzlir yiz 65—67 AD, mzli kc tqmncpx-ngr-mople mz presin mz nzwrde krali, tqaenzli-ngrde nznibq-krdr nide. Kztedeng amrlx nzrlaszpxlr nide, a' ngi txpwz Luk kc tzmncng badr. Yrle letz lc x sc tzbz ate.

Mz letz lc, Pol pibzle mz Timoti da kcng naokatrlyr nide mz nzwztr-krbzle mz Gct. X rngidrlvz-ngrbzle bade mz nztu-amqngi-krde mz nzrlxngiti-krde x nzwz-krde kxmule-esz' da kx prtz. Rpi-kzpzle bade kx, “Sutitx-zlwzbz drtwrnye kx navz-kaipe' x mzli r nenq kzprla kc ate.” Murde krlzle kx ycpe pipz nzbz-krde.

<sup>1</sup> Nim la Timoti. Ninge Pol, aposol ne Mevalu Jiszs. X mcpX Gct ninge mz nzyapwxtipx-krnye nzlungr kxboi kc tqesalz-ngrbzle mz leplz kcng tzlxngitilr Mevalu Jiszs.

<sup>2</sup> Timoti, apubo bam trtem angidr. X krka'-ngrne kx Gct Trtegu x Kxetu rgu Mevalu Jiszs, nakabzlr bam zmrlz ngrdr kxmyalz, nzmnc-zpwxngr, x nayc mz drtwrdr nim.

<sup>3</sup> Wztrpo mz Gct mz nabz kxtubq, da kc tzwai melrmqngeng. X mzli kang kqllu krka'-ngrne nim, x awi-zvz-ngrbo bade.

<sup>4</sup> Mz nzdctipxkr drtwrnge mzli kc tqprszpx-ngrne nim, tqyrni-ngrme bange, sutitx zlvz drtwrnge nzmc-krnge nim, murde na-abrtz-mouki.

*Natu-amqngi Mz Nzwztr-krbzme Mz Kxetu, Kxmule-esz' Drtqm Nzaetqbz*

<sup>5</sup> Krlz-angidrx kx lxngiti-zpwxq Kxetu rgu. Murde blrkqm Lois x lxem Yunis, nzalvztr-ngrdr nim, mz nzlxngiti-krm Jiszs Kxnmcpx. X krlz-kzx kx nzrlxngiti-krm sc tqxplrpe krlzmle mzli ka.

<sup>6</sup> A' mzli ka nadcpx mz drtwrm mzli kc tqyrlqo-ngrbo mqnge bam, x Gct avzomle bam zmatq ngr Mqngrkxtr mz nzwztr-krbzme bade. X drtwrm napqtr zvz mz nzwz-nqblq-krm zmatq lc.

<sup>7</sup> Murde Mqngrkxtr ngi nou zmatq, nivz, x nzaclve-lzbqngr. A' trbatrpwzleu zmwxl.

<sup>8</sup> Delc, bzkq mwxlrq nzpipx-krbzme Kxetu rgu mz leplz, x bzkq myangr drtqm nzmncpx-krmc mz presin mz nzwztr-krbo bade. A' narlrpx-lzbq-ngrn mz nzyapwxtipx-krm Nrpakxmrlz mz zmatq ngr Mqngrkxtr, kxmule-esz' drtqm nzaetqbz da kc tqwaix.

<sup>9-10</sup> X Nrpakxmrlz lc nide sele.

Gct arlapxle x kqlele nigu nzngini-krngu doa kxnztr nedeng, mz nzvz-nqblq-krde me pnz drtwrde x zmrlz ngrde kxmyalz. A' trvzpxpuu mz da kx aleku. Murde mzli kc nrlc trnzwzka-ngrde, Gct pnzpe drtwrde

kx Mevalu Jiszs Kxnzmcpx na-arlapxle nigu. X mz nzvzo-krmle mz nrlc, aovxiole zmatq ngr nzbzngr. X Nrpakxmrlz aelwapx-ngrde kxnamu nzprtrngr mz nzlungr kxboi.

<sup>11</sup> X nzmcpx ninge mz nzngini-krnge aposol mz nzalvztrngr x nzrlepngxr Nrpakxmrlz.

<sup>12</sup> X mzli ka, mz nzwztr-krnge lc mz Nrpakxmrlz, dekc tqaetqmle drtqnge x tqmncpx-ngrmc mz presin. A' trmya-ngru drtqnge. Murde krlzx Gct kc tqabrkitrx drtwrnge. X lxngitix kx sa nabatrple Nrpakxmrlz kc tqaprcmle bange nzryapwxtipx-zvzngr nakrlzbzle nzyzlu-krm Jiszs.\*

<sup>13</sup> Timoti, nadcpx mz drtwrm nzalvztrngr kxtubq kcng tqpibo bam. X alvztr-zpwxzbz mz leplz. X mz nzaxvctr-krbzme mz Mevalu Jiszs, navz zvz nzabrtr-krbzme drtwrm bade x nzmrlzti-krm nide.

<sup>14</sup> X mz nzokatrkr Mqngrkxtr kc tqmncpxm bagu, aclve angidr Nrpakxmrlz kc tzaprcbz bam. Murde nzalvztr-ngrng amrlx mz Nrpakxmrlz lc natubqpwxz mz nzyapwxtipx-krmleng.

<sup>15</sup> Krlzpeq kx kxnzrlxngiting nzklung dalr Provins kc Ēsia, trnztu-amqngiung mz nzokatrkrdr ninge, a' mzli ka nzrlaszpelr ninge. X wai-kzle Fijelz x Hzmcjinis.

<sup>16-18</sup> A' abrtz-zlwz-ngrne Onesiforzs. Krlzpeq kxmu nzokatr-krde ninge mztea Efszs. X mzli kc tqkaputr-ngrmle Rom, rtangrtile ninge, vz vz

---

\* **1:12** Kzdung leplz nztekqtr-krdr ngalrde lc blepxbz, mz nzrpi-krdr kx, "X lxngitix kx sa na-aclve-angidrle nzlu-krnge, nakrlzbzle mzli kc nabz-ngrne o nzyzlu-krm Jiszs." Kzdung natq mz Grik tropxu.

mzli kx rmcti-ngrde ninge. X trmya-ngru drtqde nzmncpx-krmc mz presin. A' okatr-zvzle ninge. X delc, mz nzkrka'-krnge, tqrlxti-ngrbo mz Kxetu rgu kx na-amrlzle lr ma nyzde mzli ka. X krka'-ngrne kx Kxetu rgu nayc mz drtwrde nide mzli kc nayzlu-ngrm Jiszs.

## 2

<sup>1</sup> Mrlxnge Timoti, nzrlxngiti-krm naxplr mz nzokatrkr Mevalu Jiszs nim.

<sup>2</sup> Xlr-zvzme nzalvztr-krnge mz Nrpakxmrlz. Mzli ka, aprcbz nzalvztrngr lcngr mz leplz kcng tqabrtrpzkcu drtwrgu badr mz nzalvztr-krdr kz-dung kz leplz, murde leplz lcngr na-alvztr-moulr kzdung kz leplz.

<sup>3</sup> Rlrpx-lzbqngr, da kc tqwaix, mz nzwztr-krbzki mz Mevalu Jiszs, kxmule-esz' drtqgi nza-etqbz.

<sup>4</sup> Na-apuki ncblo ngr vea, kc tqvz-nqblqpwzle kxetu rde. X tr-rlr-ngrpwzleu nzaotrkr ncte dalr nrlc. X dekc tqabrtzlvzngr kxetu rde nide.

<sup>5</sup> X na-apu-kzki doa kx prtr mz nzesangr. Murde vz-nqblqpwzle nqmqr ngr nzesangr, murde natwzle da kxmrlz.

<sup>6</sup> X na-apu-kzki doa kxwz kato mz nrlanc. Murde sa nangq-kaile dalr nrlanc kc tqetqti drtqde.

<sup>7</sup> Na-aoti vzv drtwrm nzymne-ebzpxngr lcngr tq, murde Kxetu rgu na-aopxbzle bam kxnamu nzwztr-krbzme bade.

<sup>8</sup> Delc, nayc-zvz-ngrde mz drtwrm Nrpakxmrlz lc tqyapwxtipxx mz nzwztr-krbo bade, kxmule-esz' nzaetqbz drtqm. Murde Jiszs Kxnmcpx

kc tqvzpxm mz nqvi lr King Devet, drtqde nzaetq-kaipz mz nznribqngr nide, a' tulz-mop mz nzbzngr.

<sup>9</sup> X drtqnge nzaetq-kzpz mz nzamyati-ngrm drtqnge x nzamncpx-krmlr ninge mz presin. X nzapusr-ngrdr ninge ncblo kx xpqbrlrngr lou murde lepxx Nrpakxmrlz. A' natq Gct rblx nzapqbrlvzngr mz presin.

<sup>10</sup> Delc, tqvz-zvzngr nzlep-xkrnge Nrpakxmrlz, x rlrpx-lzbq-ngrne mz nzprtilz-krdr ninge da lcng amrlx, murde leplz kcng tqmcp-x Gct narlapx-kzng, mz nzlxngiti-krdr Mevalu Jiszs, x naprtr-kzng mz nzlungr kxboi Heven.

<sup>11-13</sup> Murde natq angidr deseleng.

Mz nzbzmi-krgr Kraes, sa nalu-aloku badr.

Mz nztu-amqngi-krgr mz nzrlxngitingr, sa na-acleku badr mz nrlc kc navzm.

A' nekeng nzpxtpx-ngrdr nide, sa napxtpx-kz-ngrde nidr.

Kxmule-esz' taoku mz nzatutr-krgr da kx esalz-ngrbzku bade, a' trtxpnzngr nztao-krde mz nzatutr-krde da kx esalz-ngrmle bagu.

Murde nqm-q kr Kraes trpnzngr nztekqtr-krde, a' vz-nqblq-zvzle nqm-q krde lc tqmrlz.

### *Kxnzawz Angidr Ne Gct*

<sup>14</sup> Timoti, adcp-x-mopwz mz leplz nemqng natq kcmang tqpi-kaipo. X mz drtq Gct, rpwa'-ngrbz badr nzotablrlvz-krdr natq kx akipxle leplz. Murde trokatrleu leplz, a' atrkatile kxnz-lalztqng.

<sup>15</sup> Navz zvz nzalvztr-zpwx-krm Nrpa ngr Jiszs, murde nakrlzq kx Gct abrtzlvzle nzalvztr-krmq lcng x drtqm trmyau mz nzmc-krdeleng.

16 A' kapx-lzbqm mz leplz keng tzymnetr-ngrdr dalr nrlc. Murde drtwr kxmule lc tramatqleu Gct x trokatrleu leplz. A' mailztxpxle nidr mz nzrtxlvlz-zvz-krdr alwx ngrdr.

17 X nzalvztr-krdr lcng tqtrka sa naetunepx mz mzlirmu. X na-apule kxsqki kc tqngi kansz. Kzdq kxnzalvztr-rbr lcng drtqde Haemznezs x kzdq kz drtqde Filetzs.

18 Nzvz-rlrubzng mz nzalvztrngr angidr. Murde nzrpilr kx nigu kxnzrlxngiting sc tzatulzpeng mz nzbzng x trpe-moungr nztulzkr nrkrdrtqgu kalr. Nzalvztrngr lc tqatrkatipezle nzrlxngitkr kzdung leplz. ✧

19 A' krlzku kx nzalvztrngr angidrng kc tqkabz Gct sa natu-amqngi-alo. Murde Nzryrngrkxtr rpile kx, *“Yawe krlz-angidrlc nekeng leplz nedeng.”* ✧ X rpi-kzle kx, *“Leplz amrlx keng tzplzpxlr kx nzlxngitilr Kxetu naesablqtilr nqm q krdr kxtrka.”* ✧

20 Mz nzvz-nqblq-krde nqm q krgu, mzli kx vz-ngrm kzdq kxetu mz ma nyzgu, rkabzku bade dakxnzng kxmrlzti, mz nzamatq-krgu nide. A' mzli kx mnc-nrgu esz'-krgu, trmu-zvzkuu dakxnzng kxnamulr krkcng tzkabz bade.

21 X krlc nzymne-ebzpxngr kx navz-nqblqku. Nzmu alqngi-lzbqku mz da keng tqtrka, apuku dakxnzng keng tqmrlz. X takitrd nzmcp x nigu mz nzokatr-krgu Kxetu rgu, murde tqolique-nrgu mz nzale-zvz-krgu da kxmrlzti.

22 Mz nzm-krde lcde, kx Timoti, esablqti da

---

✧ **2:18** 1 Korint 15 ✧ **2:19** Nzkqlu-krdr 16:5; Jon 10:14 ✧ **2:19** Joel 2:32; Sam 34:12-14; Nzryrplaxngr 3:7

kxtrka amrlx kcng tzmrlzbx mz obla. A' mz nzokatrkr leplz kcng tzlxngitilr Kxetu rgu x tzsuti drtwrdr nzabrtzlvz-krde nidr, navz zvz nzale-krm da kxtubq, nztu-amqngi-krm mz nzrlxngitilr-krdu, nzmrlzti-krm Gct x leplz, x nzmnc-zpwx-kz-krmu badr.

<sup>23</sup> Eu, navz zvz mz nzpxtxpx-krm nzaongr drtwr kcng tqangqngu-ngrde leplz, murde nzbatrpzlr nzotablgr.

<sup>24</sup> Murde kxnzawz ne Kxetu, bzkq nzotablgr x drtwrde ngya ani mz nzatrkatikr leplz nide. A' nangingide mrlx kx okatrle leplz amrlx x alvztr angidr.

<sup>25</sup> X mz nivz lr Kxetu, na-atubqtile leplz kcng tzpxtxpx-ngrdr nide, murde mwx elx Gct naokatrle nidr mz nztekqtr-krdr nqm q nr drtwrdr x nalxngitilr natq angidr.

<sup>26</sup> X drtwrdr naopx, murde narlapxbzng mz nzesabrtikr Setzn, kc tqrtulrtr-ngrbzle badr nzale-krdr me pnz drtwrde.

### 3

#### *Leplz Kxnztrkang Mzli Ka Tqaenzli-ngrgu Nyzylu-krm Jiszs*

<sup>1</sup> Nakrlzq kx mzli ka tqaenzli-ngrgu nyzylu-krm Jiszs sa naprtr-kzku mz nzkxpungr kang kqlu.

<sup>2</sup> Murde kxmule-esz' nzrpilr kx nzlxngitilr Jiszs, a' leplz nzkqlung sa navz-rbrng. Sa na-aoti txpwz drtwrdr nidr esz'-krdr, x namrlzbx badr trau. Sa naglqpx-lzbqng x nalcpung. Sa narpiqting leplz x narnzlvzolzr natq trtedr x

lxedr. Trna-abrtzlvzlru da kxmrlz x trna-amatq-kzlru Gct.

<sup>3</sup> Trpnzngr scdr nivz x trnakrlzlru nzipqngr leplz. Trna-aclvetio-lzbqung x sa narpikiti-katong leplz. Trpnzngr nzrycng mzdrtwr badr, x sa natrka badr da kxmrlz amrlx.

<sup>4</sup> Trpnzngr nardr x sa na-amwalr kztedrng. Sa namrlzbx badr alwx ngr nrkrdrtdr namyaszpxle nzvz-nqblq-krdr Gct.

<sup>5</sup> Leplz lcng sa naprtrpqng bagu mz nzrpi-krdr kx nidr lrmakxtr. A' trtingr, murde trnzrlpx-lzbq-ngrpwzung mz zmatq ngr Mqn-grkxtr, nztektqr-krde nabzdr. Delc nayrlqpx-lzbq-ngrbzku badr.

<sup>6-7</sup> Kzdung leplz kxnmulr lcng nzprtrpzng mz ma nyz olvz kcng nzrlxngiti-krdr trxplru, mz nzesabrti-krdr leng mz nzalvztr-rbr-krdr. X olvz lcng nzvz-nqblq-tpwzlr drtwrdr esz'-krdr. X o ani tpxwz nzrtwz-krdr nrpa kznike vzne, murde nzrpilr narmcti-ngrdr nrwx. A' rblx nzkrlz-krdr da angidr murde suti drtwrdr alwx ngrdr namyaszpxle nzvz-nqblq-krdr Gct, kc tqngi nou nrwx.

<sup>8-9</sup> Ncblo kcng tzvznebzng mz ma lcng, nzpibqtilr Nrpakxmrlz. Murde nzaokrdr drtwrdr kxdrka'-ngrng, x nzvz-rbrng mz nzrlxngiti-krdr. Ncblo lcng nzapulr Janzs x Jabrzs kcng bqnc, tzpibqtilr nzalvztrkr Mosis. A' nzpokia-krdr aelwapx-lzbqpengr. X mz nqmqlcpwz, ncblo kcng tzvzneng mzli ka, nzvz-rbr-



krdr sa naopx kalr. \*

*Vz-nqblqpwz Nzalvztrngr Angidr*

<sup>10</sup> Timoti, vz-nqblqpeq nzalvztr-krnge, nqmq krnge, me pnz drtwrnge, nzrlxngiti-krnge, trnzngya-ani-kru drtwrnge, nivz lrnge, x nztu-amqngi-krnge.

<sup>11</sup> X krlzpeq kxmu nzatrkatikrdr ninge, x nzaetqkrdr drtqnge mzli kc tqmnc-ngrne mztea Adiok, Ikonizm, x Listra. ✧ Kxmule-esz' sc tzatrkatilr ninge, a' Kxetu rgu sc tqokatrpele ninge x arlapxle ninge murde ma tqbzx.

<sup>12</sup> Murde da zpwxtx kx leplz amrlx kcng tzsuti drtwrdr nzvz-nqblqkrdr me pnz drtwr Gct mz nzlxngiti-krdr Mevalu Jiszs, sa na-atrkati kz leplz nidr.

<sup>13</sup> A' leplz kxdrka'-ngrng badr kxnpokia-ngrdr kxnlxngitilr Jiszs, nztrka-krdr sa naetunepx zvz. X sa naesabrtilr leplz murde nzesabrti-kaing.

<sup>14</sup> Timoti, krlzq kx nzalvztr-krgr ngi da angidr, murde krlz-zpwxq nigr kcng tzalvztrlr nim. Delc, navz zvz mz nzlxngiti-krmle.

<sup>15</sup> Abzo mzli kc tqtopwzbe-ngrn, krlz-zpwxq Nzryrnrkxtr. X zmatq ngrde alvztrpele nim kx nabrti drtwrm Mevalu Jiszs mz nzarlapxkrde nim.

<sup>16</sup> Gct kaomle natq amrlx mz Nzryrnrkxtr mz zmatq ngr Mqngrkxtr, murde natq lcng naokatrllr leplz mz nzalvztrkrdr nidr, mz nzlc-apqzbzkrdr

---

\* **3:8-9** Mzle-lzbq lcng, Janzs x Jabrzs, drtqdr trnzzyroung mz Nzryrnrkxtr. A' mz nqmq kr lr Jiu, nzrpilr kx ncblo lcng nidr ncblo neng King r Ijpt kxnzrningeng dabo ngr nzaelwaxp-krdr rlx kx vzpxm mz drka'. [Nzrlaszng 7:11-22; 8:7-19] ✧ **3:11** Aposol 13:50; 14:4-6, 19-20

nidr, mz nzatubqti-krdr nidr, x mz nzaelwapx-krbzlr badr nzmncngr kxtubqbz mz nzobqkr Gct.

<sup>17</sup> Murde doa nedeng, naoliqting mz nzale-krbzlr da kxmrlz mz leplz.

## 4

### *Nzwz-krm Navz Zvz*

<sup>1-2</sup> Timoti, mz nzwz-krm, naoliq-zvzq mz nzyapwxtipx-krm Nrpakxmrlz, kxmule-esz' mrlzbz bam o mrlzbz mz leplz o trtingr. Nzalvztr-krm naokatrle leplz mz nzaopx-krde da kx vz-rbr, x mz nzatubqti-krde nidr x mz nzapqtr-krbzle drtwrdr. X aenzli-zpwxzbz badr mz nzvz-nqblq-krdr natqm. Murde Mevalu Jiszs x Gct Trte sa tzobqlvz-ngrdr nzwz-krm. X mzli kc Mevalu Jiszs navz-ngrmle mz nznngini-krde King r nrlc, sa napipxbzle mz leplz amrlx nztubq-krdr o trtingr, kxmule-esz' kxnzlubeng o kxnzbzpeng.

<sup>3</sup> Murde kalr, leplz trnavz-nqblqlru nza-lvztrngr angidrng. A' sa navz-nqblq-tpwzlr me pnz drtwrdr x nalalztq-lzbzng mz kxnzalvztrng kcng drtwrdr tqesz'ti badr.

<sup>4</sup> X sa naesablqtilr da angidr mz nzo-lxlvrti-krdr be ngr nqmq krdr kcng trngiu da angidr x da kx trpnzng drtwr ngrde.

<sup>5</sup> A' nim, kx Timoti, namnc-nrwx-ngrn mz da amrlx. Kxmule-esz' nzaetqzbz drtqm, a' navz zvz mz nzale-krm nzwznggr kcng tqaprcbo bam. Ryapwpxzbz Nrpakxmrlz mz leplz kcng trnzlxn-gitikalr Jiszs, mz nzrlrpx-lzbq-krbzme mz Kxetu rgu, da kc tqwaix.

6-7 Murde rlrpx-lzbqpe-ngrbo mz Gct, kxmule-  
esz' ycpe pipz nznibq-krdr ninge. X angidatipex  
nzwzngr kc tqaprcmle bange mz nznigini-krnge  
ncblo ngr vea kxmrlz ne Kraes. Murde ota-  
zpwpxex mz nztu-amqngi-krnge mz nzrlxngit-  
ingr. X vo-angidr-kzx mz nzesangr kc tqyrlqmle  
bange x sc tqayrkrpxpex. ☆

8 X krlzx kx sa natwzx da kxmrlzting Heven kx  
nzvzpxmqng mz nzabrtzlvzkr Gct nzmnc-krnge  
mz nrlc ka. Murde Kxetu rgu tubq zvz mz  
nzayzlu-krbzle da mz leplz. X mzli kc nayzlu-  
ngrmle, sa nakamle bange da lcng tqmrlzting.  
X leplz amrlx kcng tzaenzli-kzlr nzyzlu-krmle  
x tqabrtzlvz-kzle nidr, sa natwz-kzlr da lcng  
tqmrlzting.

### *Natq Ngr Nzarlr-lzbqngr*

9 Sutitz zlwz drtwrnge nzvz-ani-krme Rom mz  
nzmnc-lxblr-krgi.

10 Murde Demas mrlz zlwz bade dalr nrlc.  
X rlaszpele ninge x vzpe taon kc Tesalonika.  
Kresen vzpe mz nzwz-krde mz Galesia Provins,  
x Taetus vzpe kz mz Dalamasia Provins.

11-12 Atwzlrpe-ngrbo Tikikzs bam mz nztekqtr-  
alzu-krde nim mz taon kc Efiszsz. A' Luk kx  
mnc-tpwzkr ncdr mzli ka. Oti Jon Mak x  
vzmamu ncdr, murde krlzle nzokatr-krde ninge  
mz nzwzngr mrka.

13 Mzli kc navz-ngrme, twzm du dztungeng.  
Twzm kot scnge, ycbz mz mzlegi Kapzs mrkc  
mztea Troas. X twz-kzp buk scngeng, myapxbz  
krkcng twzngr mz be kzu.

---

☆ 4:6-7 2 Timoti 2:4-5

14-15 Nzmu kx tqrmctiq Aleksada kc tqrwzngr aian, aclvetio nide. Murde rpwa'-ngrde nzalvztr-krngu, x yctxbz nzatrkatikrde ninge. A' krlz-angidrx kx Gct sa na-ayrplapxle nide.

16 Mzli kc tqkot-ayrnr-ngrne mrka Rom, trpnzngr kztegunng kx okatrle ninge. Murde nzrlasz-ngrdr ninge mz nzmwxlr-krdr. A' krka'-ngrne kx Kxetu rgu naipqle nidr.

17 Murde Kxetu txpwz kx tum mz nibrnge x abrmle nelznge. Delc tqyapwxtipx-zpwx-ngrbo Nrpakxmrlz mz leplz amrlx kcng trngiulrjiu tzmncng mz kot. X Gct arlapxle ninge murde trznibqkalr ninge.

18 X krlzx kx Kxetu sa na-arlapxbzle ninge mz da kxtrka amrlx. X sa na-aprtrle ninge mrnyzde Heven.

X naglqpx zvz nide. Eu, angida.

19-21 Eu, sutitx-zlwzbz drtwrnge kx navz-kaipe' x mzli r nenq kzprla kc ate. Murde Erastzs sc tqmnc taon kc Korint x Trofimzs sc tqamncxtne mrkc mztea Miletzs, murde yagox.

Timoti, rpibz "Nimu la," mz Prisila ncdr Akwila, x lr ma nyz Onesiforz. Doa lrmakxtr amrlx mrka, myapxbz Yubulzs, Prudens, Linzs, x Klaodia, nzrpibzlr bam kx, "Nim la."

22 Krka'-ngrne kx Kxetu rgu namnc zvz mz nabzm. X naokatrle nimu amrlx mz zmrlz ngrde kxmyalz. Eu, angida.

Delape. Ninge *Pol*.

**Nzryrngrkxtr Kc Ate Rut x Sam**  
**The New Testament plus Ruth and Psalms is the**  
**Natügu language of the Solomon Islands**  
**Buk Baibel long langguis Natqgu**

copyright © 2008 Wycliffe Bible Translators, Inc.

Language: Natqgu (Natügu)

Translation by: SITAG

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-11-17

---

PDF generated using Haiola and XeLaTeX on 18 Apr 2025 from source files dated 31 Aug 2023

fb2b7f06-e254-5fb7-b59d-ee21d5d7a93f